

Transkription von Urkunde HST 1368c

Ort, Datierung: Stralsund, 1368-05-02

Signatur: Landesarchiv Greifswald, VRep. 1, Stralsund, 64

Inhalt: Johannes Pribe: Rechtsstreit

Wy joh(ann)es pribe . vnde pribe schulte brude(re) . vnde Reyneke schulte / vnse leue om . bekenne(n)
openbare in desseme ieghenwerdighe(n) breue. / Dat wy na rade vnser neysten . vnser rechten
erfname(n) vmme / de schelinghe . de wy hadden myd deme abbete . vnde myd deme / gantzen
kouente to hiddenze vmme dat werder dat ghe/nūmet is Radmers werder . Dat dar licht binnen de
schede / des sinxtes . Dat wy an spreken vor eyn an ver storuen erue. / Des wy berichtet syn . van
openbarer bewysinghe erer breue. / De se hebben van den vorsten des landes . Dar hebbe wy
af/ghelaten . vnde laten dar af . Wy vnde vnse rechten erfnamen . / Vnde vnse neysten . nicht mer to
manende . eder to esschende . noch / to sakende . to ewighen tyden . Vortmer so hebbe wy eyne(n)
brūder / de noch nicht mündich is . Dar loue wy vor weret dat he to synen / mu(n)dighen iaren queme
. vnde wolde saken vp dat vorsproken / werder so willen wy den vorb(enomeden) abbet vnde syn
kouent scadelos / holden . vor alle ansprake gheboren eder vngheboren . Weret ouer / dat ienighe breue
eder ienighe andere bewisinghe in to kome(n)der / tiid . by vns eder by vnsen erfname(n) ofte vrūde
worde ghevūden / de vns to deme vorb(enomeden) werd(er)e to spreke(n) eder hulplich mochte(n) syn
. / de scolē ghebroken vnde machtlos syn . al desse stücke stede vnde / vast to holende. So henghe wy
Joh(ann)es pribe . vnde Reyneke vorb(enomede) vnse Ingesegele vor dessen bref . Des hebben myd vns
ghelouet desse / guden lude ju(n)ge pribe hen(n)eke ben(n)ebacke merten Raddemers . / vnde michel
rūtze in guden truwen . vnde myd eyner samenden / hant . Ghe screuen to deme sunde na godes bord
dusent iar dre/hundert iar . in deme achten vnde sestigesten iare . des achten daghes / na sunte marcus
daghe des hilghen ewangelisten